

天津政俗沿革記卷十五

兵事

自古遭亂離焚剽者多通都大邑而偏郡僻縣或不與焉天津在宋金之間及元明易代之際濱海荒瘠地猶不著其詳蓋莫得而紀明正德中畿輔賊劉六等犯天津守將賀勇禦之清有天下順治初元小有勘定旋即安謐自是而後休養生息人民不識兵革相與飲食宴樂而已道光閒承平日久朝士日習安熙粵中大吏相率諱言盜及其季年粵匪洪秀全起粵西竄江南分擾十餘省而捻寇亦與之迭相始終燒城剖郭所至殘破

卷十五

一

咸豐三年春粵匪分遣捍黨林鳳翔李開方等道山東破臨洺關由趙州藁城折而北趨津人大震當是時格爾沁親王僧格林沁鎮保定欽差大臣勝保奉命進攻長蘆鹽運使楊霈在天津藉丁壯置器械名曰蘆團以備不虞中朝亦豫敕在籍紳士梁寶常吳士俊汪彭及王鏞勅置天津團練立義民局局凡二十八廣募豪右得千餘人自春徂秋寇訊愈逼八月朔風雨大作津水暴漲河決城西北芥園天津兵備道張起鵠躬詣河干庀吏卒事畚築塞決口再塞再決所至漫溢田禾皆沒於水九月探報寇聚靜海縣馮官屯鹽政文謙期旦日

文武會教場中翌晨咸集將出偵知縣事謝子澄將眾以行行至城西小園無息耗眾乃少休津人賈慶堂先嘗爲寶常畫謀曰邑田野平曠無深山大林之蔽恆慮無以閉寇盜今水環吾境足限戎馬此天佑我也特水淺處雖沮如彌望然猶可潛涉宜益募鎗排阨要戒備鎗排者宜興埠人所以弋鳧雁者人伏舟中裝佛郎機於其上藝精巧能命中寶常從所畫策是日慶堂率之伏得勝口之東延袤里許密如設筭且以鐃聲爲約併樹溝建壘結浮橋以自固津人張錦文偕前湖北都司倪虎榜僉募勇三千人來會是夜寇在良王莊顧人猶

卷十五

二

未之覺二十八日突有老人詣眾警曰寇盡集黃氏塋次晨炊將傳餐且垂至矣登高瞭望寇果蓐食而來於是知縣事謝子澄麾眾直前薄之長蘆運使楊霈亦整蘆團自側邀擊寇中渠率僞所稱開山王者也夙以輕迅僥狡著手黃旗左右揮鋒銳甚我軍鎗上擊則驟伏下擊則立騰躍距地且數尺更番升降煙塵晦冥中輒蹈之以進一大沽老卒詫曰是寇悍且黠宜以智取乃挾二鎗上下逆擊中其要害立隕寇大氣沮飲彈殪者相枕藉遂大崩潰寇殞於是役者凡五百餘人我眾顧無一傷亡時援軍未集寇眾我寡不敢乘勝逐北乃振

旅而歸寇旣遁趣楊柳青鄉民有至自靜海者遇諸塗
睨之寇皆疲敝僵仆以多寡殊絕不克追躡越月七日
督師大臣勝保始統所部自保州蒞津旣而進頓獨流
知縣事謝子澄從之以行是歲十一月子澄聞副都統
佟鑑行陷淖中爲賊所困子澄躬自馳救受殊傷赴水
死從役于鵬龍者亦偕亡越日得尸鵬龍負子澄面如
生初子澄聞寇警集眾喻以大義且出獄囚爲選鋒出
入行閒爲士民倡逮是以守土吏越境討寇卒蹈於難
朝野嗟歎津人念其德至今祠祀不衰明年正月寇乘
大雪謀竄歸山東欽差大臣僧格林沁築甬道圍之乃

卷十五

三

生擒僞丞相林鳳翔致京師伏誅焉同治三年湘軍曾
國荃拔江甯殄洪寇積年逋誅始就夷滅其餘孽併入
捻匪復縱橫齊豫楚皖之郊捻匪者起豫皖閒蔓延南
北十餘年然未嘗擾及河北也同治六年其渠張總愚
始北渡自秦晉犯畿輔日蹕行數百里遠近震驚津人
以禍患頻仍益形危懼是時欽差大臣左宗棠自陝追
寇入直隸順德欽差大臣李鴻章亦甫殲捻寇任柱於
山東移師北嚮入衛京師諸帥勤王天下勁旅並集畿
內而通商大臣崇厚方駐津爲諸道軍蒐軍實集芻糧
津人鄧啟元隸崇厚麾下厚以教練鎗隊屬之歸厚節

制逮捻事迫令啟元屯良王莊良王莊距城五十里津
要隘也會崇厚慮城守空虛欲檄之歸啟元以爲擁兵
守城延寇近郭非計也因止不歸寇至啟元禦之甄埽
小灘力與相持日以礮隊轟擊會援軍集境上寇遂披
靡而遁津城獲全然猶東西竄擾勤王諸軍環畿內馳
逐諸帥力贊會國藩隄防圈制之議寇日窮困始殲之
徒駭河自道咸以降二寇跳梁中原鼎沸國內名城鉅
郡多爲戰場士民死難者至不可紀極天津負海帶河
爲畿南重鎮密邇京師國內用兵此爲必爭之地得良
有司與士大夫鳩心一力防禦綏輯卒易禍爲福庶民

卷十五

四

尤慷慨赴義兵革倥傯閒慮軍中糗糧不時給輸豆粥
麥餅者相屬於道是以屢戡寇侮一邑乂安市易如故
民不失業然亦若有天幸焉易曰安不忘危因舉當時
控制措注之詳與夫調集籌備之策撮錄官書悉著之
於篇

順治元年五月遣固山額真金礪梅勒章京李率泰安
撫天津等處亂民

固山額真譚泰準塔等率前鋒兵追流寇至眞定破之
燕京以北各城及天津等處皆降

五年五月天津妖婦張氏假稱故明天啟后同黨王禮

張天保私製玉印令旗謀爲不軌被獲伏誅
八月天津巡撫李猶龍奏土寇常元輔妄稱威武王謀
犯天津總兵官蘇屏翰統兵往勦元輔就擒
咸豐三年五月粵匪猖熾調盛京兵四千名吉林兵二
千名大凌河馬二千匹命錦州副都統維祿伯都訥副
都統倭克精額統帶赴天津備調

七月長蘆鹽政文謙奏天津爲水陸衝要拱衛京畿所
有稽查奸宄彈壓地方均關緊要奉旨慶祺專辦天津
巡防事宜其見駐天津之盛京官兵卽歸慶祺調度

九月奉旨天津團練頗有成效著文謙會同該鎮道認

卷十五

五

眞督勸實力操演並飭在籍前任巡撫梁寶常督率倡
辦

逆匪擾及趙州有意北竄奉旨著慶祺統帶盛京官兵
二千名由天津水路啟程赴省迎勦

勝保奏天津街市立有火會凡遇救火之時鳴鑼立聚
萬人若發給器械等件可以齊力殺賊等語奉旨著文
謙體察情形飭屬團集務須曉以大義俾知互相守衛
卽所以自保身家儻逆匪有東竄天津之信該鹽政等
務卽相機布置勿稍疏虞

桂良奏水路由深州可通豫河直至天津滏陽河一帶

界連冀州獻縣等處亦連天津爲鹽船聚集之所奉旨著勝保酌籌妥防

慶祺奉旨帶領盛京官兵截擊逆賊東竄天津之路並著勝保酌量調度其河閒天津等處何路緊要卽著撥兵迅速進勦並隨時知照僧格林沁等相機夾擊

文謙奏逆匪竄擾天津接仗獲勝並稱勝保之兵追賊卽日可到奉旨著惠親王奕紀等添派京營官兵前往應援

十月奕紀所帶兵一千名又添撥熱河古北口兵八百五十名幫同天津官兵進勦不可但令守城置之無用

卷十五

六

之地達洪阿由捷徑赴天津係從何處行走必須趕到協勦萬勿遲延

逆匪盤據靜海奉旨令達洪阿赴津與奕紀會同勝保南北夾攻

逆匪全股俱在靜海城內屯聚奕紀達洪阿由天津赴靜海會同夾攻

勝保奏賊匪由獨流近偪楊柳青進勦獲勝見在紮營楊柳青街外

上諭朕聞天津勇目劉積德係監禁回民經天津縣知縣謝子澄從獄中提出派令帶領鄉勇幫同官軍殺賊

甚屬得力查實保奏

十一月上諭朕素聞天津地方民心強固物力豐饒所練鄉勇人等類皆饒健整齊足資禦賊九月二十八逆匪由青縣突竄天津彼時大兵尙未到齊經文謙等分督防守官兵迎頭截勦該處練勇隨同天津縣知縣謝子澄直前迎殺擒斬甚多卽雁戶排鎗亦足佐官兵鎗礮之不逮該練勇等忠義勇敢洵屬可嘉文謙特克慎張起鵠錢忻和謝子澄平日撫馭得宜亦可概見著勝保傳旨嘉獎

上諭據勝保奏鄉勇馮玉德能入賊壘探聽虛實是天津練勇均知同仇敵愾奮勇可嘉傳旨優獎

卷十五

七

勝保在獨流北岸督勦天津謝子澄同副都統佟鑑在南岸擊賊逆匪沿隄上下狂奔窘蹙萬狀佟鑑見賊勢大潰飛馬親赴濠邊欲拽賊營搭濠板片斷賊歸路隨行兵丁不過二三百名該逆拌死從佟鑑背後衝去將我兵分爲兩截佟鑑到岸卽飭兵丁併力搜取板片不意爲冰所膠急不能拔親自下馬督拽足滑而踏賊眾蠡擁來刺謝子澄見佟鑑失陷策馬赴援身受七傷卽與佟鑑同時陣亡

奉旨贈直隸獨流陣亡副都統佟鑑將軍子祭葬世職

如將軍例諡剛節入祀昭忠祠贈升用知府謝子澄布政使銜予祭葬世職如布政使例諡忠愍建祠原籍均於地方建立專祠

十二月上諭昨因天津練勇需人統束降旨令勝保傳諭文謙卽赴大營管帶鄉勇以資駕馭本日據鴻臚寺卿齊承彥奏請飭票商張錦文隨同照料鄉勇等語該商前於賊撲縣境時捐資助勦復源源接濟餅餌以爲鄉勇打仗之需好義急公具徵誠悃若令前往軍營必可固結義勇之心該大臣等亦得收驅策之效著文謙迅飭張錦文馳赴該鹽政營中隨同照料鄉勇

卷十五

八

文謙奏天津各鋪戶每夜分段巡查器械號衣均係自行捐辦數月以來幫同地方查拏奸匪並無疏懈奉諭著文謙先行傳旨獎勵並諭令該鋪戶務各始終奮勉互相保護俟軍務告竣卽行據實保奏

上諭朕聞謝子澄被害時傳有勇目余姓竭力救援同時殉難並著勝保查明準將勇目坵祀謝子澄專祠以彰義烈

四年二月張亮基奏查本月初二日委員陳韜等在直東邊界截獲逆匪王小湧劉鳳彩二名據王小湧供稱上年九月閒投入賊營逆首林鳳祥因其兇悍用爲親

軍十一月二十三日羣逆攻撲官兵營盤該犯用長矛刺殺都統佟鑑見知縣謝子澄前往趨救該犯卽在陣前大喝活捉天津謝知縣羣賊蠢擁向前鎗礮齊施旋聞謝知縣已死羣賊憚其威名互相慶賀劉鳳彩供稱屢與官兵接仗亦爲林逆信用奉旨將該犯等正法在德州城外爲都統佟鑑天津縣知縣謝子澄設位遙祭以慰忠魂

閏七月上諭見在連鎮逆匪雖未殲除而順直地方頗屬安靜所有雄縣霸州天津此三處防兵酌量應留應撤以節靡費以定人心

卷十五

九

十一年十二月浙江省城失守蘇浙驍悍之賊圖犯上海東南賊勢鴟張天津海口爲近畿要地恐該匪乘虛北犯奉旨著文煜崇厚成明馳赴天津海口察看形勢扼要設防

同治元年二月命崇厚成明督辦天津海防

六年十一月上諭官文穆騰阿奏官軍追勦捻匪獲勝並見在布置防勦情形暨賊向南皮逃竄各摺片梟匪見竄南皮天津一面喫重該處爲直省完善之區尤當加意防備崇厚務飭天津所屬各州縣實力巡防並飭帶兵各員會合南北各軍迎頭截擊毋任蔓延

上諭穆騰阿馳抵滄州勦賊獲勝並賊匪渡河竄至海豐各摺片西路要隘卽派兵堵禦毋任回竄該處與天津毗連崇厚亦當派兵截擊毋使擾及完善

七年正月上諭官文等如有擒獲匪首張總愚者卽照拏獲任柱之案給賞其願給官職者卽加等優獎著官文等再行出示曉諭軍民使各奮勉並於天津等處妥爲防堵以壯聲勢

崇厚奏賊匪覬覦天津奉旨著崇厚當妥籌布置實力嚴防所有前經調出之鎗隊練軍卽著崇厚飭陳濟清統帶回紮靜海一帶力顧東南

卷十五

十

二月崇厚奏賊氛北徧由深祁高陽竄擾任邱河間非北向雄固卽東撲天津奉旨著官文於潘鼎新程文炳兩軍內速撥得力之軍兼程馳赴雄縣任邱大城一帶均勻分布與丁寶楨所部東軍嚴行扼截左宗棠當速催前敵各軍進勦

上諭所有保定西北兩面及屏蔽易州一帶著官文左宗棠分飭所部相機扼防保定東北兩面并天津迤南及界連山東地方並大名以北著李鴻章崇厚丁寶楨分飭兵勇扼要堵勦

賊匪竄擾獻縣之淮鎮並青縣之杜林鎮趨近津南情

形萬分喫緊該處地廣兵單需兵甚急且各路軍火糧餉均藉津郡轉運接濟奉旨著左宗棠官文速派劉松山郭寶昌宋慶張曜等各軍星夜兼程分道前進丁寶楨駐軍河閒與天津兵勇互相援應並著李鴻章派得力大枝勁旅數軍由德州河閒等處兼程迎頭進攻崇厚督飭鄧啟元陳濟清等軍在津南一帶奮力迎勦左宗棠奏臣準崇厚來咨捻逆游騎逼近青滄津南喫緊旋據深州探報賊騎回竄州境距城僅十餘里等語賊情狡詐難保非西南游駛牽誤我軍仍逞其圖犯津滄之計臣抵高陽後如賊勢仍趨東路臣卽馳赴天津

卷十五

之北向南壓勦如賊由深州西南竄走卽檄程文炳自高陽急起追截臣亦由東北而西南督軍奮擊見已飛檄前敵各軍偵賊所向分道兜勦並力顧津南一帶三月定安等軍移紮河閒以北一帶奉旨著崇厚派天津洋鎗練勇飭令該統將陳濟清等與定安等聯絡聲勢兼顧津防

四月恭親王等陳奏接據探報捻匪於三十日竄至荏平德平邊馬已至德州吳橋以北東光以南均見火光是東軍雖獲勝仗而逆蹤實已北竄各軍仍落賊後此次逆匪狂奔注意河閒天津奉旨著崇厚迅飭余承恩

劉景芳陳濟清等軍確探賊蹤迎頭攔截毋令闖入津郡

捻匪由山東德州擾及直境之吳橋東光一帶益向北趨距津郡愈近奉旨著崇厚嚴防津郡分飭余承恩等軍與李鴻章前敵諸軍會合夾擊

崇厚奏捻逆竄犯靜海思渡運河西岸本月初五日經總兵陳濟清派隊堵遏副將鄧啟元統率所部在軹塢小灘等處迎賊鏖戰力挫兇鋒該逆敗向東南奔竄津郡以安奉旨著崇厚督飭陳濟清鄧啟元等趁此聲威聯絡諸軍務將此股捻逆迅速殄除以清畿輔

卷十五

崇厚奏捻匪竄至津郡稍直口並靜海良王莊等處經津軍擊敗退向東南郭松林等淮軍見已追抵津郡溫德勒克西等軍亦相繼而進王心安一軍見已馳抵靜海該逆又向西南竄動深虞繞竄西北左宗棠見已由德州趨向東北奉旨著卽沿運河西岸探賊所向力扼運防毋任竄渡北犯

閏四月上諭內閣盛京將軍都興阿著管理神機營事務授爲欽差大臣馳赴天津等處會同左宗棠李鴻章勦辦賊匪所有春壽陳國瑞張曜宋慶四軍馬步各隊均歸調遣其餘吉林黑龍江馬隊並著都興阿酌量紮

調三口通商大臣兵部左侍郎崇厚著幫辦都興阿軍
務兼籌糧餉軍火以資接濟仍駐天津督辦防守事宜
七月李鴻章英翰由六百里加緊馳奏官軍會勦捻逆
全股蕩平

崇厚奏撥天津倉米賑恤難民

天津政俗沿革記卷十五終